

Հավելված N 1
ՀՀ վարչապետի 2018 թվականի
նոյեմբերի 19 -ի N 1535 -Ա
որոշման

Կ Ա Զ Մ

ԳԵՐԻՆԵՐԻ, ՊԱՏԱՆԴՆԵՐԻ ԵՎ ԱՆՀԱՅՏ ԿՈՐԱԾ ԱՆՁԱՆՑ ՀԱՐՑԵՐՈՎ ԶԲԱՂՎՈՂ
ՄԻՋԳԵՐԱՏԵՍՉԱԿԱՆ ՀԱՆՁՆԱԺՈՂՈՎԻ

- ՀՀ պաշտպանության նախարար (հանձնաժողովի նախագահ)
- ՀՀ ոստիկանության պետի առաջին տեղակալ (հանձնաժողովի նախագահի տեղակալ)
- ՀՀ առողջապահության նախարարի տեղակալ
- ՀՀ ազգային անվտանգության ծառայության տնօրենի տեղակալ
- ՀՀ արտաքին գործերի նախարարի տեղակալ
- ՀՀ աշխատանքի և սոցիալական հարցերի նախարարի տեղակալ
- ՀՀ տարածքային կառավարման և զարգացման նախարարի տեղակալ
- ՀՀ ազգային անվտանգության ծառայության ռազմական հակահետախուզության ղեկավար տամենտի պետի տեղակալ
- ՀՀ պաշտպանության նախարարության զինծառայողների սոցիալական պաշտպանության վարչության պետ
- Գերիների, պատանդների և անհայտ կորածների հարցերով զբաղվող հասարակական կազմակերպությունների ներկայացուցիչներ (համաձայնությամբ):

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ՊԱՇՏՈՆԱԿԱՏԱՐ

Ն. ՓԱՇԻՆՅԱՆ

ԳԵՐԻՆԵՐԻ, ՊԱՏԱՆԴՆԵՐԻ ԵՎ ԱՆՀԱՅՑ ԿՈՐԱԾ ԱՆՁԱՆՑ ՀԱՐՑԵՐՈՎ ԶԲԱՂՎՈՂ
ՄԻՋԳԵՐԱՏԵՍՉԱԿԱՆ ՀԱՆՁՆԱԺՈՂՈՎԻ ԱՇԽԱՏԱԿԱՐԳ

1. Սույն աշխատակարգով կարգավորվում են գերիների, պատանդների և անհայտ կորածների հարցերով զբաղվող միջգերատեսչական հանձնաժողովի (այսուհետ՝ հանձնաժողով) գործունեության կազմակերպման հետ կապված հարաբերությունները: Հանձնաժողովը մշտապես գործող խորհրդակցական մարմին է, որի գործունեությունը կանոնակարգվում է ՀՀ օրենսդրությամբ:

2. Հանձնաժողովի խնդիրներն են՝

1) իր իրավասությունների սահմաններում կազմակերպել գերի ընկած և անհայտ կորած, ինչպես նաև պատանդ վերցված և անհայտ կորած անձանց որոնողական ու վերադարձնելու աշխատանքները:

2) համագործակցել հասարակական և միջազգային կազմակերպությունների հետ:

3) մշտական կապ պահպանել գերիների, պատանդների և անհայտ կորածների ընտանիքների անդամների ու հարազատների, ինչպես նաև շահագրգիռ կազմակերպությունների հետ:

3. Հանձնաժողովն իր խնդիրներին համապատասխան՝

1) հաշվառում է Հայաստանի Հանրապետությունում և Ադրբեյջանի Հանրապետությունում գտնվող գերիներին ու պատանդներին, ինչպես նաև անհայտ կորածներին:

2) աջակցում է գերիների, պատանդների և անհայտ կորածների որոնման, հայտնաբերման ու վերադարձնելու ուղղությամբ պետական կառավարման համակարգի և տեղական ինքնակառավարման մարմինների, հասարակական կազմակերպությունների անհատ քաղաքացիների (համաձայնությամբ) աշխատանքներին:

3) համապատասխան մարմիններին առաջարկություն է ներկայացնում գերիների, պատանդների և անհայտ կորածների հարցերով քարոզչության, որոնողական ու փոխանակման աշխատանքների վերաբերյալ:

4) կազմակերպում է գերիների, պատանդների և անհայտ կորածների հարցերով զբաղվող բոլոր մարմինների ու միջազգային կազմակերպությունների հետ հանդիպումներ,

գիտաժողովներ, ինչպես նաև մասնակցում է արտասահմանյան երկրներում անցկացվող համանման միջոցառումներին.

5) մշտական կապ է պահպանում գերիների, պատանդների և անհայտ կորածների հարցերով զբաղվող բոլոր մարմինների (անհրաժեշտության դեպքում՝ նաև անհատ քաղաքացիների) հետ՝ ապահովելով տեղեկատվության նպատակային և առավել արդյունավետ օգտագործումը.

6) գերիների, պատանդների և անհայտ կորածների հարազատներին անմիջապես հաղորդում է ունեցած հավաստի և թույլատրելի տեղեկատվությունը, ինչպես նաև քննարկում է նրանց կողմից ներկայացված առաջարկությունները.

7) պետական կառավարման համակարգի և տեղական ինքնակառավարման մարմիններին առաջարկություններ է ներկայացնում գերիների, պատանդների և անհայտ կորածների ընտանիքներին սոցիալական աջակցություն ցուցաբերելու ուղղությամբ:

4. Հանձնաժողովը կազմված է 14 անդամից, որոնցից 4-ը՝ գերիների, պատանդների և անհայտ կորածների հարցերով զբաղվող հասարակական կազմակերպությունների ներկայացուցիչներից: Հանձնաժողովը գլխավորում է Հայաստանի Հանրապետության պաշտպանության նախարարը: Հանձնաժողովի անհատական կազմը հաստատվում է Հայաստանի Հանրապետության պաշտպանության նախարարի հրամանով: Հանձնաժողովի անդամները հանձնաժողովի աշխատանքներին մասնակցում են հասարակական հիմունքներով:

5. Հանձնաժողովի կազմում ընդգրկվելու նպատակով՝ սույն որոշման N 1 հավելվածում նշված պետական կառավարման մարմինները պաշտպանության նախարարություն են ներկայացնում հանձնաժողովի կազմում ընդգրկվող պաշտոնատար անձանց տվյալները: Հանձնաժողովի կազմում ներկայացուցիչներ ունենալու ցանկություն ունեցող՝ գերիների, պատանդների և անհայտ կորածների հարցերով զբաղվող հասարակական կազմակերպությունները Հայաստանի Հանրապետության պաշտպանության նախարարության պաշտոնական կայքում հրապարակված հայտարարության հիման վրա դիմում են ներկայացնում հանձնաժողովի նախագահին (հայտարարությունում նշված ձևով և ժամկետներում):

6. Հանձնաժողովի կազմում թափուր տեղ առաջանալու դեպքում՝ հանձնաժողովի նոր անդամի նշանակումն իրականացվում է սույն աշխատակարգի 4-րդ և 5-րդ կետերով սահմանված կարգով:

7. Հանձնաժողովի աշխատանքները կազմակերպվում են նիստերի միջոցով: Նիստերը հրավիրում և անցկացնում է հանձնաժողովի նախագահը, իսկ նրա բացակայության

դեպքում՝ հանձնաժողովի նախագահի որոշմամբ՝ հանձնաժողովի նախագահի տեղակալը: Նիստերը հրավիրվում են ըստ անհրաժեշտության, բայց ոչ պակաս, քան վեց ամիսը մեկ անգամ: Հանձնաժողովի նիստերի հրավիրման օրվա, վայրի և ժամանակի մասին հանձնաժողովի քարտուղարը հանձնաժողովի անդամներին ծանուցում է նիստից առնվազն 5 աշխատանքային օր առաջ:

8. Հանձնաժողովի նիստն իրավագոր է, եթե դրան ներկա է հանձնաժողովի անդամների կեսից ավելին: Հանձնաժողովի նիստի վերաբերյալ հանձնաժողովի քարտուղարի կողմից կազմվում է արձանագրություն, որն ստորագրվում է հանձնաժողովի նախագահի և նիստին ներկա գտնվող անդամների կողմից:

9. Հանձնաժողովի նախագահը՝

- 1) կազմակերպում է հանձնաժողովի գործունեությունը.
- 2) ներկայացնում է հանձնաժողովը պետական կառավարման համակարգի և տեղական ինքնակառավարման մարմիններում, միջազգային և այլ կազմակերպություններում.
- 3) իրականացնում է սույն աշխատակարգից բխող այլ լիազորություններ:

10. Հանձնաժողովի անդամները՝

1) մասնակցում են հանձնաժողովի նիստերին, հանձնաժողովի աշխատանքային պլանների մշակման և իրագործման հետ կապված աշխատանքներին.

2) աջակցում են պետական կառավարման համակարգի և տեղական ինքնակառավարման մարմիններին, կազմակերպություններին ու քաղաքացիներին՝ գերիների, պատանդների և անհայտ կորածների որոնման, հայտնաբերման ու վերադարձնելու գործում:

11. Հանձնաժողովի նիստերի միջև ընկած ժամանակահատվածում աշխատանքային մարմին է համարվում հանձնաժողովի կողմից կազմավորված՝ հինգ հոգուց բաղկացած աշխատանքային խումբը, որի կազմից աշխատանքային խմբի ղեկավարին նշանակում է հանձնաժողովի նախագահը: Աշխատանքային խմբում ընդգրկվում են Հայաստանի Հանրապետության պաշտպանության նախարարության՝ 3 և Հայաստանի Հանրապետության ոստիկանության ու Հայաստանի Հանրապետության ազգային անվտանգության ծառայության՝ տվյալ մարմինների ղեկավարների հետ համաձայնեցված մեկական ներկայացուցիչ:

12. Աշխատանքային խմբի ղեկավարն ի պաշտոնե հանձնաժողովի քարտուղարն է, որը հանձնաժողովի անդամ չէ և՝

- 1) նախապատրաստում է հանձնաժողովի նիստերը.
- 2) կազմում է աշխատանքների իրականացման ծրագիր.
- 3) նախապատրաստում է առաջարկություններ հանձնաժողովի աշխատանքային պլաններ կազմելու և կատարելու վերաբերյալ.

4) մշակում և հանձնաժողովի քննարկմանն է ներկայացնում վերջինիս գործունեության ոլորտին վերաբերող նյութերն ու ընթացիկ տեղեկությունները, ինչպես նաև նախապատրաստում է դրանց վերաբերող առաջարկություններ:

5) վերլուծում է հանձնաժողովի գործունեության ոլորտին վերաբերող հարցերը և արդյունքների մասին զեկուցում հանձնաժողովի նախագահին:

13. Հանձնաժողովի գործունեության կազմակերպական-տեխնիկական աշխատանքների իրականացումն ապահովում է Հայաստանի Հանրապետության պաշտպանության նախարարությունը:

14. Հանձնաժողովի գործունեության հետ կապված փաստաթղթերի պահպանությունն իրականացվում է օրենսդրությամբ սահմանված կարգով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ՊԱՇՏՈՆԱԿԱՏԱՐ

Ն. ՓԱՇԻՆՅԱՆ